



PRAVILNIK

o prijavi i uvjetima za ovjeru političkog subjekta za učešće na Lokalnim izborima 2024. godine

Sarajevo, maj 2024. godine

Na osnovu člana 2.9 stav (1) tačka 2, a u vezi člana 4.4, 4.5 stav (2), 4.10, 4.11, 4.12, 4.13, 4.15, 4.19, 4.22 stav (1) i 4.24 Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 33/08, 37/08, 32/10, 18/13, 7/14, 31/16, 41/20, 38/22, 52/22, 67/22 i 24/24), Centralna izborna komisija Bosne i Hercegovine je na 20. sjednici, održanoj 03. 05. 2024. godine, donijela

PRAVILNIK

o prijavi i uvjetima za ovjeru političkog subjekta za učešće na Lokalnim izborima 2024. godine

Član 1. (Predmet)

Pravilnikom o prijavi i uvjetima za ovjeru političkog subjekata za učešće na Lokalnim izborima 2024. godine (u daljnjem tekstu: Pravilnik) propisuje se način podnošenja prijava za ovjeru i uvjeti za ovjeru političke stranke, nezavisnog kandidata, koalicija, listi nezavisnih kandidata ili listi nezavisnih kandidata za izbor pripadnika nacionalnih manjina (u daljem tekstu: politički subjekt), način podnošenja potpisa podrške i uvjeti oslobađanja obaveze prikupljanja potpisa podrške, te način provjere i potvrđivanja potpisa podrške, način podnošenja kandidatskih listi i visina takse uz prijavu za ovjeru političkog subjekta i izgled i sadržaj obrazaca za podnošenje prijava za ovjeru političkog subjekta, kao i izgled i sadržaj obrazaca kandidatskih listi i propisanih izjava, za učešće na Lokalnim izborima 2024. godine.

Član 2.

(Način podnošenja prijava za ovjeru i komuniciranje između Centralne izborne komisije BiH i strana u postupku – član 4.4 stav (1), član 4.10, član 4.12, član 4.15, član 4.19 stav (4) i član 4.24 Izbornog zakona BiH)

(1) Prijava za ovjeru političkog subjekta, kao i prijave kandidata i kandidatskih listi, podnose se isključivo elektronski, putem on-line portala Centralne izborne komisije BiH „e-izbori“. Pristup online portalu se ostvaruje korištenjem bilo kojeg internet-pretraživača koristeći adresu izbornog portala CIK BiH (<https://eizbori.izbori.ba>).

(2) Za otvaranje korisničkog naloga i pristupa on-line portalu e-Izbori politički subjekt dužan je podnijeti pisani zahtjev, na način propisan Uputstvom o postupku dostavljanja, prijema, obrade i arhiviranja prijava političkog subjekta elektronskim putem broj: 05-1-02-2-595-1/24 od 03.05.2024. godine (u daljem tekstu: Uputstvo).

(3) Nakon završenog unosa podataka, u skladu sa stavom (1) ovog člana, obrasci prijave sa svim potrebnim podacima, koje je potrebno odštampati, potpisati, ovjeriti i dostavljaju se neposredno u sjedište Centralne izborne komisije Bosne i Hercegovine (u daljnjem tekstu: Centralna izborna komisija BiH), u propisanom roku za dostavu prijava.

(4) U izbornom periodu, komuniciranje između Centralne izborne komisije BiH i političkog subjekta se odvija:

- a) neposredno u sjedištu Centralne izborne komisije BiH
- b) putem elektronske pošte,
- c) putem internet portala e-Izbori.
- d) putem telefaks-aparata i
- e) putem telefona.

(5) Politički subjekt dužan je u prijavi za ovjeru navesti adresu sjedišta, broj telefona, telefaksa i e-mail adresu.

Član 3.

(Uvjeti za ovjeru prijave – član 1.6, član 1.13, član 4.3, član 13.14 i član 15.1 Izbornog zakona BiH)

(1) Politički subjekt, uz prijavu za učešće na Lokalnim izborima 2024. godine, pored potpisa podrške iz člana 4.4 Izbornog zakona BiH, podnosi sljedeću dokumentaciju:

- a) rješenje o upisu u registar kod nadležnog organa za novoosnovane političke stranke koje nije starije od 60 dana; ukoliko je rješenje starije od 60 dana dostavlja se originalni izvod iz sudskog registra koji nije stariji od 60 dana za ranije registrovane političke stranke, u skladu s članom 4.3 Izbornog zakona BiH (podnose samo političke stranke);
- b) izjavu propisanu članom 1.6 i 1.13 Izbornog zakona BiH potpisanu od strane predsjednika političkog subjekta čija vjerodostojnost potpisa je potvrđena ovjerom nadležnog organa. Ova izjava može biti potpisana od strane predsjednika političkog subjekta i u sjedištu Centralne izborne komisije BiH, u prisustvu ovlaštenog službenog lica Centralne izborne komisije BiH. Prilikom potpisivanja izjave u sjedištu Centralne izborne komisije BiH ovlašteno službeno lice Centralne izborne komisije BiH utvrđuje identitet predsjednika političkog subjekta na osnovu važeće lične isprave iz člana 5.12 stav (4) Izbornog zakona BiH;
- c) dokaz o uplaćenom novčanom iznosu takse za ovjeru u skladu s članom 4. ovog Pravilnika;
- d) finansijski izvještaj koji obuhvata period od tri (3) mjeseca prije podnošenja prijave, u skladu s članom 15.1a Izbornog zakona BiH;
- e) potpisanu i ovjerenu izjavu kod nadležnog organa ili kod Centralne izborne komisije BiH da nema neizmirenih obaveza po osnovu pravosnažnih i izvršnih odluka o izrečenim novčanim kaznama koje je izrekla Centralna izborna komisija BiH, osim u slučaju da se plaćanje kazne vrši u ratama, u skladu sa Odlukom Centralne izborne komisije BiH.
- f) broj računa za finansiranje izborne kampanje u skladu sa članom 15.1b Izbornog zakona BiH,
- g) Izvještaj o prometu posebnog računa za finansiranje troškova izborne kampanje, u skladu sa članom 15.1d stav (1) Izbornog zakona BiH (izvodi banke sa računa ili analitička kartica banke) i
- h) akt o određivanju ovlaštenog predstavnika koalicije/liste nezavisnih kandidata potpisan od strane svih predsjednika političkih stranaka članica koalicije/ svih nezavisnih kandidata (podnose koalicije i liste nezavisnih kandidata).

(2) Prijavni obrazac sa svim priložima utvrđenim u stavu (1) ovog člana, politički subjekt dužan je u elektronskom obliku dostaviti putem on-line portala e-Izbori na način utvrđen Uputstvom o postupku dostavljanja, prijema, obrade i arhiviranja prijava političkog subjekta elektronskim putem.

(3) Originalnu dokumentaciju iz stava (1) ovog člana, nakon završenog unosa prijave, politički subjekt je dužan dostaviti lično u Centralnu izbornu komisiju BiH do roka utvrđenog za podnošenje prijave.

(4) Prijavu političkog subjekta koja nije podnesena u roku ili nije podnesena na način utvrđen u stavu (2) i (3) ovog člana, Centralna izborna komisija BiH odbacuje.

Član 4.

(Visina takse za ovjeru – član 4.16 stav (1) Izbornog zakona BiH)

(1) Taksa za ovjeru prijave političkog subjekta za učešće na Lokalnim izborima 2024. godine određuje se u visini novčanog iznosa, kako slijedi:

- a) Političke stranke uplaćuju 2.000,00 KM za političku stranku koja se kandiduje u sjedištu stranke za načelnika odnosno gradonačelnika i za općinsko vijeće, odnosno skupštinu općine, gradsko vijeće odnosno skupštinu grada, te po 200,00 KM za kandidovanje u

svakoj novoj izbornoj jedinici, za načelnika odnosno gradonačelnika i za općinsko vijeće odnosno skupštinu općine, gradsko vijeće odnosno skupštinu grada.

- b) Nezavisni kandidati uplaćuju 1.000,00 KM za kandidaturu za načelnika općine ili gradonačelnika, općinsko vijeće odnosno skupštinu općine, gradsko vijeće odnosno skupštinu grada i Skupštinu Brčko distrikta Bosne i Hercegovine.

(2) Za prijavu za učešće na izborima za popunu garantiranih mandata za pripadnike nacionalnih manjina ne uplaćuje se taksa.

(3) Politička stranka i nezavisni kandidat obavezni su novčani iznos takse za ovjeru iz stava (1) ovog člana, uplatiti sa svog transakcijskog računa koji će se namjenski koristiti za izbornu kampanju tokom Lokalnih izbora 2024. godine, na račun JRT broj: 0000030000000145 kod Centralne banke BiH, svrha uplate: uplata takse na podračun Centralne izborne komisije BiH broj 37111614.

(4) Uplaćeni novčani iznos takse za ovjeru se vraća na način utvrđen članom 4.16 Izbornog zakona Bosne i Hercegovine.

(5) Centralna izborna komisija BiH pokreće proceduru povrata novca kod nadležnog organa u roku od 15 dana od dana objave izbornih rezultata u službenim glasilima u Bosni i Hercegovini.

(6) Sredstva koja ne budu vraćena političkom subjektu po osnovama navedenim u ovom članu, postaju prihod budžeta institucija Bosne i Hercegovine i međunarodnih obaveza Bosne i Hercegovine.

Član 5.

(Način prikupljanja i unosa potpisa podrške – član 4.4 stav (2), (3), (4) i (5) Izbornog zakona BiH)

- (1) Potpise podrške prikuplja lice zaduženo za prikupljanje potpisa podrške i koje je odgovorno za vjerodostojnost prikupljenih potpisa birača koji podržavaju prijavu političke stranke ili nezavisnog kandidata (u daljem tekstu: potpisi podrške) prikupljaju se na obrascu koji je sastavni dio ovog Pravilnika, koji se preuzimaju i štampaju putem online portala e-izbori.
- (2) Prikupljanje potpisa podrške birača koji podržavaju prijavu političke stranke ili nezavisnog kandidata vrši politička stranka ili nezavisni kandidat, ličnim unosom podataka o biraču u obrascu i svojeručnim potpisivanjem birača u rubriku za potpis.
- (3) Obrazac obavezno sadrži podatke o licu koje je odgovorno za prikupljanje potpisa podrške, koje je dužno voditi računa da potpis birača mora odgovarati potpisu sa identifikacionog dokumenta, u skladu sa članom 5.13 stav (2) Izbornog zakona BiH.
- (4) Nakon prikupljenih potpisa podrške, lice zaduženo za prikupljanje potpisa obavezno upisuje ukupan broj potpisa na toj strani i potpisuje se na svaku stranicu obrasca. Ukoliko se ne unesu podaci o licu koje je prikupljalo potpise podrške, potpisi koji se nalaze na toj strani bit će odbijeni.
- (5) Prikupljene potpise podrške birača koji podržavaju prijavu političke stranke ili nezavisnog kandidata, ovlašteno lice političke stranke ili nezavisnog kandidata obavezno unosi putem on-line portala e-Izbora na dalju obradu i provjeru u skladu sa Uputstvom.
- (6) Politička stranka je dužna svojim aktom zadužiti lice koje će prikupljati potpise podrške, koje je odgovorno za tačnost i vjerodostojnost potpisa i po zahtjevu Centralne izborne komisije BiH dužna je dostaviti predmetni akt.

Član 6.

(Oslobađanje od obaveze prikupljanja potpisa podrške – član 4.5 Izbornog zakona BiH)

- (1) Politička stranka i nezavisni kandidat, oslobođeni su obaveze prikupljanja potpisa podrške za načelnika, odnosno gradonačelnika i u općinskom vijeću, skupštini općine, skupštini grada i gradskom vijeću ukoliko imaju nosioca mandata načelnika odnosno gradonačelnika ili nosioca mandata u općinskom vijeću, skupštini općine, skupštini grada i gradskom vijeću za koji se podnosi prijava.
- (2) Politički subjekt dostavlja potpisanu izjavu kojom potvrđuje da je izabrani zvaničnik tog subjekta osvojio mandat na Lokalnim izborima 2020. godine i da je još uvijek član tog subjekta, koju Centralna izborna komisija BiH u proceduri ovjere, provjerava sa potvrđenim rezultatima izbora i bazom dodjeljenih mandata za Lokalne izbore 2020 godine.
- (3) Politička stranka i nezavisni kandidat koji imaju nosioca mandata na višem nivou od lokalnog nivoa, a nemaju nosioca mandata na lokalnom nivou obavezni su prikupljati potpise podrške.
- (4) Broj potrebnih potpisa podrške, utvrđen članom 4.4 stav (5) tačka 5. i 6. Izbornog zakona BiH, nije potrebno zasebno prikupljati za kandidaturu za načelnika općine odnosno gradonačelnika grada i općinsko odnosno gradsko vijeće, ukoliko se radi o istoj osnovnoj izbornoj jedinici, a prema rezultatima posljednjih Lokalnih izbora 2020. godine, ako je politički subjekt imao osvojeni mandat.
- (5) Osnov za oslobađanje od obaveze prikupljanja potpisa podrške iz stava (1) ovog člana su potvrđeni rezultati na posljednjim lokalnim izborima.

Član 7.

(Koalicija kao nosilac mandata – član 4.13 i član 4.15 Izbornog zakona BiH)

Ako je mandat osvojila koalicija ili lista nezavisnih kandidata na Lokalnim izborima 2020. godine, smatra se da je svaka politička stranka članica te koalicije ili svaki nezavisni kandidat na listi nezavisnih kandidata osvojio mandat i oslobođeni su obaveze prikupljanja potpisa podrške.

Član 8.

(Način provjere potpisa podrške – član 4.11 Izbornog zakona BiH)

- (1) Provjera potpisa podrške iz člana 4.4 stav (5) Izbornog zakona BiH obuhvata sljedeće radnje i postupke:
 - a) da li je politička stranka ili nezavisni kandidat dostavio originalni obrazac sa potpisima podrške birača i da li je identičan priloženom e-dokumentu,
 - b) usporedbom unesenih podataka putem on-line portala e-Izbori i podataka iz Centralnog biračkog spiska (podatka o JMB i izbornoj jedinici za koju birač ima pravo glasa), odnosno da li je birač koji podržava političku stranku ili nezavisnog kandidata upisan u Centralni birački spisak za glasanje za izbornu jedinicu za koju se podnosi prijava za učešće na izborima,
 - c) da li je birač već dao potpis podrške za drugu političku stranku ili nezavisnog kandidata,
 - d) da li je unesen utvrđeni broj ispravnih podataka o potpisima podrške.
- (2) Ukoliko je broj prihvaćenih originalnih potpisa jednak ili veći od broja originalnih potpisa podrške koji se zahtjeva prema odredbama člana 4.4 stav (5) Izbornog zakona BiH, Centralna izborna komisija BiH će prihvatiti potpise podrške političke stranke ili nezavisnog kandidata.
- (3) Za potpise podrške za koje se utvrdi da je dalo lice koje nije upisano u Centralni birački spisak kao birač ili nije upisan u izbornoj jedinici za koju se podnose potpisi podrške, potpis će se smatrati nevažećim.

(4) Potpis podrške birača za dvije ili više političkih stranaka ili nezavisnih kandidata će biti prihvaćen samo za političku stranku ili nezavisnog kandidata koji je prvi unio takav potpis putem on-line portala, a smatrat će se nevažećim za sve druge političke stranke ili nezavisne kandidate kojima je dat.

(5) Ukoliko je politička stranka ili nezavisni kandidat dostavio i unio broj potpisa podrške koji se zahtjeva prema odredbi člana 4.4 stav (5) Izbornog zakona BiH, ali isti ne sadrži dovoljan broj ispravnih potpisa podrške utvrđenih na osnovu provjera iz tačke b) i c) ovog člana, dužan je u roku od dva dana od dana prijema obavještenja Centralne izborne komisije BiH otkloniti nepravilnost.

(6) Politička stranka ili nezavisni kandidat koji ne dopuni broj nedostajućih potpisa podrške u predviđenom roku ili dopunjeni broj potpisa podrške nakon provjere bude manji od utvrđenog broja propisanog članom 4.4 stav (5) Izbornog zakona BiH, neće biti ovjereni za učešće na izborima, odnosno mogu biti ovjereni za organ za koji je podnesen dovoljan broj validnih potpisa podrške.

(7) Politička stranka ili nezavisni kandidat za koje se utvrdi da su uz prijavu podnijeli manji broj potpisa podrške od zahtjevanog broja potpisa propisanih članom 4.4 stav (5) Izbornog zakona BiH ili potpisi nisu u skladu sa članom 5.13 stav (2) Izbornog zakona BiH, neće biti ovjereni za učešće na izborima, odnosno provjera potpisa podrške će biti izvršena samo za one organe za koje je podnesen dovoljan broj potpisa podrške.

(8) Za izbor predstavnika za popunu garantiranih mandata za pripadnike nacionalnih manjina ne podnose se potpisi podrške birača upisanih u Centralni birački spisak.

Član 9.

(Određivanje šifre – član 4.22 stav (1) Izbornog zakona BiH)

U svrhu vođenja evidencije o prijavama političkih subjekata za ovjeru učešća na izborima, Centralna izborna komisija BiH određuje posebne šifre s ciljem informatičke i statističke obrade podataka za političke subjekte koji podnesu prijavu za ovjeru za učešće na Lokalnim izborima 2024. godine.

Član 10.

(Način podnošenja i obrada kandidatskih listi)

- (1) Ovjereni politički subjekt, popunjavanje i preuzimanje obrazaca kandidatskih listi, vrši putem on-line portala e-Izbori, www.izbori.ba.
- (2) Unosom podataka o kandidatu putem on-line portala e-Izbori, vrši se provjera ispunjavanja uslova kandidata za učešće na izborima utvrđenih članom 4.2 Izbornog zakona BiH, te provjera usklađenosti kandidatske liste u skladu sa članom 4.19 Izbornog zakona BiH.
- (3) Nakon unosa podataka o kandidatu, te izvršene provjere iz stava (2) ovog člana, političkom subjektu omogućeno je preuzimanje i štampanje obrazaca kandidatskih listi putem on-line portala e-Izbori, www.izbori.ba.
- (4) Originalne i potpisane obrasce kandidatskih listi od strane ovlaštene osobe sa ovjerenom izjavom kandidata, utvrđenoj u članu 4.19 stav (4) Izbornog zakona BiH, politički subjekt dužan je, lično dostaviti u Centralnu izbornu komisiju BiH do roka utvrđenog u članu 4.21 Izbornog zakona BiH.
- (5) Raspodjela kandidata manje zastupljenog spola na kandidatskim listama utvrđena članom 4.19 Izbornog zakona BiH, vrši se prema Instrukciji o raspodjeli kandidata manje zastupljenog spola na kandidatskim listama, koja je sastavni dio ovog Pravilnika.

Član 11.

(Prilozi)

(1) Sastavni dio ovog Pravilnika, su forma i izgled sljedećih obrazaca:

- a) Obrazac prijave za ovjeru političkih subjekata (političke stranke, nezavisnog kandidata, koalicije, liste nezavisnih kandidata, nezavisnog kandidata grupe građana i nezavisnog kandidata udruženja za popunu garantiranih mandata za pripadnike nacionalnih manjina);
- b) Obrazac za prikupljanje potpisa podrške;
- c) Obrasci za prijavu kandidatske liste i izjava kandidata;
- d) Tabela zastupljenosti polova na kandidatskim listama – instrukcija o raspodjeli kandidata manje zastupljenog spola na kandidatskim listama i
- e) Zapisnik o primopredaji prijave.

(2) Obrasci iz stava (1) tačka a), b), c) i d) ovog člana, automatski se generišu nakon pristupa i popunjavanja svih potrebnih podataka na on-line portalu e-izbori, nakon čega će biti omogućeno preuzimanje i štampanje obrazaca, u roku koji Centralna izborna komisija BiH utvrdi Uputstvom o rokovima i redoslijedu izbornih radnji.

(3) Obrasci iz stava (1) ovog člana, štampat će se na jezicima i pismima koji su u službenoj upotrebi u Bosni i Hercegovini.

(4) Prilikom podnošenja prijave političkog subjekta u sjedištu Centralne izborne komisije BiH, sačinjava se zapisnik iz stava (1) tačka e) ovog člana, te se potpisivanjem istog od strane političkog subjekta smatra da je politički subjekt upoznat sa eventualnim nedostacima u prijavi.

Član 12.

(Upotreba izraza u muškom i ženskom rodu)

Riječi koje su radi preglednosti u ovom Pravilniku, navedene u jednom rodu, bez diskriminacije se odnose i na muški i na ženski rod.

Član 13.

(Prestanak primjene)

Danom stupanja na snagu ovog Pravilnika, prestaje primjena Pravilnika o prijavi i uvjetima za ovjeru političkih subjekata za učešće na Općim izborima 2022. godine ("Službeni glasnik BiH", broj 27/22).

Član 14.

(Stupanje na snagu i objava u službenim glasilima)

Ovaj Pravilnik stupa na snagu danom donošenja, a objaviće se u "Službenom glasniku BiH", u "Službenim novinama FBiH", "Službenom glasniku RS", "Službenim novinama Brčko distrikta BiH" i na internet-stranici Centralne izborne komisije BiH www.izbori.ba.

Broj: 05-1-02-2-574-1/24
Sarajevo, 03.05.2024. godine

